



Unnuisarfinnut nunatta avataaneersunut unnuisunut nunatsinni unnuinermut akitsuummik takornariaqarnermut inuussutissarsiornikkut nunatta inuinit tamanut isertitaqaataasussamik siunnerfilimmik Naalakkersuisut UKA2020 misissuinissamik peqquneqarnissaanik inatsisartut aalajangiiffissaatut siunnersuut. Misissoqquneqarluni takornariaqarnermut innarliutaasinnaanngitsumik nunat allat ilinniarfigalugit aqqissuussinissaq.

(Inatsisartunut ilaasortaq Aqqalu C. Jerimiassen, Atassut)

(Siullermeerneqarnera)

Siullermik Inatsisartunut ilaasortap Aqqalu Jeremiassen-ip matumuuna siunnersuuteqarsimaneranut qujaffigerisuppara.

Demokraatit isumaqarpugut takornariaqarnermut inuussutissarsiorneq annertusarneqarnissaminut periarfissarissaarfiusoq. Nunarsuarmioqatitta Kalaallit Nunaat paasisaqarfigilersimavaat. periarfissagissaarpugut, tamannalu sulinitinni ingerlatiinnartariaqarparput.

Namminersortut aningaasarsiornissaminut killilersungaanatik inuniatigii iluaqutissaanik suliffissanik pinngortitsinissaminut periarfissaqartinneqassapput.

Takornarialerinermit atugassarititaasut periarfissallu pitsaasut inuussutissarsiornep sinnerani ajunngitsunik malitseqartitsissaaq, tassanngalu ineriartornermut iluaqutaasapput.

Killeqanngitsumik niuersinnaanermut periarfissat siaruarterusuppagut, inuutissarsiorneq niuernermit tunngavilik killilersorneqanngitsooq, killilersugaanngitsumik unammillersinnaaneq, taakkua tassaapput sullitap takornariaappat innuttaappalluunniit atugassaanut pitsaanerpaanik pinngortitseqataasussat.

Demokraatit isumaqataapput Kalaallit nunaanni takornariaqarneq aningaasarsiorfiginerussangatsigu, akitsuutinilli nutaanik ilusilersuinerput mianersuuttariaqarparput, takornariaqarneq ajoqusissanngikkutsigu. Aappaatigummi unnuisarfitsinni il. il. illoqarfinniik allaniik aggerlutik ataatsimiigiarlutik unnuisartut amerlanerit innuttat imaluunniit suliffeqarfiit nunatsinneersuusarmata. Tamanna soorlu Hotel Arctic-imi takuneqarsinnaavoq. Siunnersuutip tassunga ajortumik kinguneqartitsinnginnissaa qulakkeertariaqarparput

Ukiuni kingullerni takornarianut nunatsinnut tikisitsiniarluni pilerinarsaarisooqarnikuuvoq, isumaqarpungalu takornarialerisut allallu branchemi tassani suliaqartut ineriartornermit peqataasimasut suliarujussuaminut nersortariaqartut. Suliarmi taanna ullumikkut inissisimanitsinnut aqqutissiuussisimavoq. Nunarput avataaniik ikittuinnarnut tikitassaarpasippoq, nunani issittuni avannarlerni tikitassarpassuarniik allaanerussuteqarluni, tamannalu angusimasinnaanngilarput taakkua sulerulussimanngikkaluarpata.



Eqqartortuarparput takornariaqarneq Nunatta aningaasarsiornerani sukat pingaernerit ilagissagaat. Taamammallu Takornariartitsisarnermut periusissiap nutaap suliarinerani qanoq ililluta inuiaqatigiit takornariaqarnermi isertittakkagut annertusarsinnaanerigut misissorneqassasoq isumaqataaffigisinnaavarput. Tamannali takornariat tikerarneranut inuussutissarsiornermullu ajoqutaanngitsumik ingerlanneqartariaqassaaq.

Taamatut oqaaseqarluta siunnersuut Inuussutissarsiornermut Ataatsimiititaliamut suliarineqarnissaanut innersuupparput.